

է մարդկանց, նրանց վերքերի վրայ դնում են ծածած հում լորի: Բայց եթէ կատաղած գազանին կարողանում են սպանել, իսկոյն կիսում են նրա մարմնի մէջտեղից և խածռւած հիւանդին անց են կացնում երկու մաս արուած դիակի կըտորների մէջից և կատաղած գազանի մազերից խուզում, խանձում և դնում են վերքերի վրայ և այսպիսով հաւատում են, որ իրենց հիւանդները կըժշկուեն: Իսկ ոմանք էլ տանում են ուխտ «Սարի-փիր» — դեղին սուրբ ասուած տեղը, որ գտնւում է Միրզաբէկլը թրքախօս Հայադաւան գիւղի հարաւային կողմը մի խիտ անտառի մէջ, ուր կան երկու տապանաքարեր՝ արաբական լեզուի արձանագրութեամբ: Այս տեղ են տանում նաև այնպիսի մարդկանց, որոնք զեղնութիւն ունեն և կամ ջրգողութեամբ փորերը ուռած են: Փորերը քսել են տալիս տապանաքարերին, որպէս զի նրանց երեսի զեղնութիւնն ու փորի ուռոյցները անցնեն — անհետանան ընդ միշտ: Եթէ մէկի տան բակում շունն սկսի անսովոր կերպով ոռնալ ծոր տալով, լսողների վրայ մի սարսափելի սարսուռց է ձգում և ժողովրդի կարծիքով մի սարսափելի դժբախտութեան նշան է համարւում: Հէնց այս իսկ պատճառով էլ ամեն կողմից կսկսեն պոռալ, որ շունը ոռնալուց դադարի: Բայց եթէ չդադարէ, շան տէրը իսկոյն նրան գնդակահար կանէ, որպէսզի մի որևէ դժբախտութիւն չպատահի իրենց, կամ հարեանների տան մէջ: Եթէ ազդաւը գայ և տան մօտ ծառի վրայ թաղած սկսէ «ղժւա — զժւա»